

**Uunga siunnersuut: illuliortiternernut aningaasalersuineq pillugu Inatsisartut inatsisaata allangortinneqarnissaa pillugu Inatsisartut inatsisaat nr. xx af xx. xxx 2020 (Nutaanik inissialiornissamut taarsigassarsiarititat taamaallaat inunnut taarsigassarsiaritinneqartassapput aammalu inissiamut ataatsimut taamaallaat taarsigassarsisinnaallutik)**  
*Ineqarnermut Attaveqaqatigiinnermullu Naalakkersuisumit siunnersuutigineqartoq*

*Pillugu*

**Sanaartornermut ataatsimiititaliap**

**ILASSUTITUT ISUMALIUTISSIISUTAA**

**Siunnersuutip aappassaanneerpeqarnerani tunniunneqartoq**

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq  
Inatsisartunut ilaasortaq Aqqaluq B. Egede, Inuit Ataqatigiit, siulittaasup tullia  
Inatsisartunut ilaasortaq, Erik Jensen Siumut  
Inatsisartunut ilaasortaq Nikkulaat Jeremiassen, Siumut  
Inatsisartunut ilaasortaq Pele Broberg, Partii Naleraq

Siunnersuut aappassaaneerinninnerup kipitinneqarnerata kingornatigut ataatsimiititaliap inassuteqaatai paasiumallugit ataatsimiititaliamut suliareqqitassanngorlugu innersuuteqqinneqarpoq. Ataatsimiititaliaq paasissutissanik allanik aalajangiinissamut tunngavissiissummut tapertaasinnaasunik ilassutitut isumaliutissiissummik saqqummiussinnermut atugassaminik pissarseqqissimangilaq.

**1. Ataatsimiititaliap oqaaseqaatai inassuteqaataalu:**

Naalakkersuisut allannguutissatut siunnersuummik saqqummiussipput, tassani § 9b, imm. 2-mi aalajangersakkami qaammatinik arfinilinnik piffissaliineq qaammatinut aqqaneq marlunnut allangortinneqarpoq.

Ataatsimiititaliap allannguutissatut siunnersuut pillugu oqaatigissavaa, inissianik taarsigassarsititsinissamik neriorsuutitalinnik tunisisunut pisisunullu iluaqutaanissaa naatsorsuutigineqartumik naaperiaasoqarpoq.

Ataatsimiititaliaq tamanna tusaatissatut tiguua.

Ataatsimiititaliap isumaqatigiittup Naalakkersuisut allannguutissatut siunnersuutaata akuersissutigineqarnissaa inassutigaa.

### **Immikkoortoq 24-imut Inuit Ataqtigiit ikinnerussuteqarlutik oqaaseqaataat**

Siunnersuut siullermeerneqarmat suliaq pitsaanngitsumik suliarineqarpoq. Aappassaaneerinnerlu unitsikkallarlugu suliassaq ataatsimiititaliamut uterteqqinneqarnissaa Inatsisartunut ilaasortat aalajangiuppaat.

Erseqqissarlara Inuit Ataqtigiit siunnersuut pineqartoq pillugu isumaliutissiissut ataatsimiititaliamit isumaqtigiittumit akuerineqarsinnaasunngorlugu suliarineqarmat. Tamatuma kingorna paasitinneqarpugut ataatsimiititaliap isumaliutissiissutaa pillugu naalackersuisooqtigiit Ineqarnermut Naalackersuisoq peqatigalugu isumaliutissiissummik allanngortitsinermik kinguneqartumik suliaqarsimasut. Tamanna ataatsimiititaliap ataatsimiinnerisa avataani pivoq.

Ataatsimiititaliap siulittaasua tamatsinnut ima allagaqarpoq, issuaavunga:

*”Immokkoortup 24-ip 23 november 2020-mi aappassaaneerineqarnissaa tallimangornermi ulloq 27. november pingajussaaneerineqarnissaa Siulittaasoqarfimmut ullumikkut ataatsimiititaliap allakktigit qinnutigippagu, siunnersuut katersuunnermi matumani naammassineqarsinnaagaluarpoq. Larl Frederik Danielsen siunnersuummi qaammatit arfinillit aqqanilinnut allanngortinneqarnissaat akuersissutigaa, tamatumanilu, ippassaq ataatsimiinitsinni utertinneqarnissaanik oqaluuserinninnerput aalajangigarpullu pisariaarutissaaq.”*

Issuaaneq naavoq.

Ataatsimiititaliap siulittaasuata allagai uppernarsaataapput inatsisartut ataatsimiititaliaata ataatsimiinnerisa avataasigut naalackersuisooqtigiit isumaliutissiissummik suliaqarsimasut, naak tamanna inerteqqutaagaluartoq.

Aappaattut, ataatsimiititaliap siulittaasuata uppernarsarpaa ataatsimiititaliami suliassat matoqqasut pillugit Ineqarnermut Naalackersuisoq isumaqtiginninniartfigineqarsimasoq, malugalugu, ataatsimiititaliap suliai pillugit, kisianni ataatsimiititaliaq avaqqullugu. Suliassat matoqqasut anninneqarsimapput.

Pingajuattut, tamanit naluneqanngilaq Naalackersuisoq kinaluunniit Inatsisartut ataatsimiititaliaasa sulinerannut akuleruttussaanginnera, sunniiniartussaanginnera, allannguinarluniluunniit paasissutissanik pisortatigoortumik iliuuseqartussaanginnera pisussaaffiuvoq. Matumanili Naalackersuisup ataatsimiititaliap ataatsimiinnerata avataastigut Naalackersuisoq isumaliutissiissummik allanngueqataasimasoq uppernarsaatissaqartipparput allakktigit. Tamanna assut ilungersunartutut Inuit Ataqtigiit isigaarput.

Inatsisartut Ineqarnermut ataatsimiititaliaani ilaasortat ataatsimoortut avaqqullugit, pisortatigoortumillu ataatsimiinnerit avataasigut qinikkat ataasiakkaat imminersuutigisaminnik suliaqarsinnaatitaanngillat, pingaartumik Naalackersuisumik peqateqarluni

isumaliutissiissutissat naammassereernikut allanngortiternerannik kinguneqartumik iliuseqarsinnaatitaanngillat.

Inuit Ataqatigiit siunnersuut isumaqatigaarput. Isumaliutissiissut partiit ataatsimoorfigisaat isumaqatiginninniarnivullu pisortatigoortumik ingerlanneqartut isumaqatigaagut. Isumaqaataanngilagulli sakkortuumik, naalakkersuisooqatigiit Naalakkersuisuutitartik peqatigalugu Ataatsimiititaliap suliai matoqqasut pillugit, illua-tungiliuttut ilisimanngisannik torsuusami aalajangersaanernik ingerlataqarsimanerat pillugu.

Isornartorsiunerit aammalu pisut ilungersunartut pillugit immikkut ittumik ataatsimiipallalaarnissatsinnik noqqaalluta Inuit Ataqatigiinniit kissaateqarsimagaluarpugut. Tamanna pillugu Siumut aamma Demokraatit tungaanniit akissuteqartoqanngilaq. Aalajangersakkat malinneqartussaapput. Suleriaaserput malinneqartussaavoq. Inuit Ataqatigiit peqquneqarpugut pissuserissaartumik suliassaq una malinneqassasoq. Pissuserissaarnissaq aamma naalakkersuisooqatigiinnut atuutsinneqassanersoq apeqquserneqarsinnaanngilaq.

Inuit Ataqatigiit isumaqatiginngilarput suliassat matoqqasut ilaasortaaqatitsinniit aniatinneqarsimmata.

Inuit Ataqatigiit isumaqatiginngilarput Ineqarnermut Naalakkersuisup ataatsimiititaliaq tamakkiisoq sullinnagu naalakkersuisooqatigiinni ataatsimiititaliamut ilaasortaatitaasut kisiisa isumaliutissiissummik allannguinermik kinguneqartumik suleqatigisimammagit, malugalugu ataatsimiititaliap ataatsimiinnerata avataani.

Siunnersuutip isumaqatigiiffiusup pisussaaffiit avaqqullugit sularieqarsimanagera akuerinagu Inuit Ataqatigiit ikinnerussuteqarlutik oqaaseqaataat saqqummiuppara. Kissaatuigaarput siunnersuut pingajussaaneertinnagu ataatsimiititaliamut uterteqqinneqarnissaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaanniigassanngortippaa.

---

Justus Hansen  
Siulittaasoq

---

Aqqaluaq B. Egede  
Siulittaasup tullia

---

Erik Jensen

---

Nikkulaat Jeremiassen

---

Pele Broberg